

困養劉握

學餘氏

紀軒

聞軒

參隨

注筆著

筆



筆隨軒蘭握

著 彝 陳

叢書集成初編

(補印本)

握蘭軒隨筆及其他三種

一九三九年十二月初版
一九五九年十月補印

商務印書館出版

上海虹口印刷廠印刷

握蘭軒隨筆卷上

清 秀水卜陳麟簡菴著

易

田何傳易授丁寬。丁寬授田王孫。王孫授沛人施讎。東海孟喜。琅琊梁邱賀。由是有施孟梁邱之學。又東郡京房授易於梁國焦延壽。別爲京氏學。又有東萊費直傳易授琅琊王橫。爲費氏學。本以古字號古文。易又沛人高相傳易授子康及蘭陵母將永。爲高氏學。母將施孟梁邱京氏四家皆立博士。費高二家未得立。

尙書

濟南伏生傳尙書。授濟南張生及千乘歐陽生。歐陽授同郡倪寬。寬授歐陽生之子。世世相傳。至曾孫高。爲尙書歐陽氏學。張生授夏侯都尉。都尉授族子始昌。昌傳族子勝。爲大夏侯氏學。勝傳從兄子建。建別爲小夏侯氏學。三家皆立博士。又魯孔安國傳古文尙書。授都尉朝。姓都尉名朝朝授膠東庸譚。爲尙書古文學。

詩

魯人申公受詩于浮邱伯。爲作訓詁。是爲魯詩。齊人轅固生亦傳詩。是爲齊詩。燕人韓嬰亦傳詩。是爲韓詩。趙人毛萇傳詩。是爲毛詩。

禮

魯高唐堂生漢興傳禮十七篇後瑕邱蕭奮以授同郡后蒼蒼授梁人戴德及德兄子聖沛人慶普於是德爲大戴禮聖爲小戴禮普爲慶氏禮孔安國所獻禮古經五十六篇及周官經六經前世傳其書未有名家

春秋

齊胡母子都傳公羊春秋授東平嬴公嬴公授東海孟卿卿授魯人眭宏宏授東海嚴彭祖魯人顏安樂彭祖爲春秋嚴氏學安樂爲春秋顏氏學又瑕邱江公傳穀梁春秋梁太傅賈誼爲春秋左氏傳訓詁授趙人貫公何休字邵公得公羊本意著公羊墨守言其義不可攻如墨翟之守城也左氏膏肓穀梁廢疾鄭元乃發墨守鍼膏肓起廢疾休見而嘆曰康成入我室操我矛以伐我乎

五禮

吉凶軍賓嘉也尙書類于上帝吉禮也如喪考妣凶禮也羣侯四朝賓禮也命禹徂征軍禮也女于時嘉禮也

人時

書敬授人時主春者張昏中可以種稷主夏者火昏中可以種黍菽主秋者虛昏中可以種麥主冬者昴昏中可以收斂也天子視四星之中知民緩急故云

禹鑄九鼎。象九州。凡山水百物皆備。秦昭王取九鼎。一飛入泗水。餘八入於秦。

印信

秦以前民皆得以金玉爲印。龍虎鈕。惟其所好。秦以來天子獨以印稱璽。又獨以玉。羣臣莫敢用。

北戶

日南之地。日色南照。故開北戶以向日。

短褐

褐以毛毳織之。若馬之衣。或以褐編衣也。短一音豎。謂褐布豎裁爲勞役之衣。短而且狹也。今用短褐字。恐誤。短爲短。

百二

得百中之二焉。秦地險固。二萬人足當諸侯百萬人。也。齊得十二。亦如之。

鐘

漢書容六石四斗。史記云。鐘致一石。未知孰是。

華路藍縷

華路。柴車。素。大輅也。藍縷。言衣敝壞。其縷藍藍然也。

薄曲

周勃以織薄曲爲生。謂織蠶薄爲生業。蠶薄卽今蠶繅也。

掃除竈上

李斯言秦欲并天下。若炊婦掃除竈上之不淨。不足爲難也。

碌碌

碌碌多石貌。又因人成事。通作鹿鹿。又作碌碌。陸陸。六六。音義竝同。

顏甲

進士王光遠干索。豪橫無厭。或遭笞辱。亦不愧恥。時人語曰。光遠慚顏。厚於十重鐵甲也。

足下

介子推不出。晉文公焚林求之。推抱木而死。公撫之甚哀。後伐木製履。每俯視則流涕。悲乎足下。足下之名自此起。

銀鹿

顏覲家僮名銀鹿。後事魯公終其身。今使人因名爲銀鹿。

青蚨

青蚨似蟬而稍大。生草間。如蠶。取其子。母卽飛來。以母血塗八十一文。以子血塗八十一文。每市物或先子錢。或先母錢。皆復飛歸。輪還往來無已。故號錢曰青蚨。

行李

左傳云行李之往來。注云行李使人也。今人以行裝爲行李。非也。當作行使解。舊文字字疑訛爲李字。與

改國字

唐武則天好改新字。有言國中著或字。或者惑也。乞以武鎮之。乃改或作武。復有言武在口中。與囚何異。乃改作王字。

金榜

崔紹暴卒復生。云見冥門列榜。人間姓名。將相列金榜。其次銀榜。州縣小吏竝列鐵榜。故至今凡登科榜。名爲金榜題名。

乾沒

漢書注云得利曰乾。失利曰沒。非也。此與陸沈之義同。

闌干

王元景使梁。劉孝綽送之。泣下。元景無淚。謝曰。卿勿怪我。別後當闌干。

門神

歲旦繪二神帖于門之左右。俗說門神通名也。蓋在左曰神荼。右曰鬱壘。

鶴田

許氏家傳孫太白山人寓南屏山蓄鶴一九杞先生入田數畝額粟若干石每歲輸以供鶴糧謂之鶴田

非錢不行

唐鄭愔爲吏部侍郎掌選貪贓不法引銓日有選人以百錢繫靴帶行步有聲愔見而問之對曰當今之選非錢不行

慎名與器

史記慎名與器不可以假人今人用作惟恐慎之訛

正月音政

正月始月端月也本讀作上聲秦避始皇諱讀改平聲爲征

荆楚

楚稱荆者以避秦莊襄王諱也王諱子楚

唐晉

唐叔虞封于唐唐叔子燮是爲晉侯以南有晉水故改焉

東道主

晉秦圍鄭鄭恐聞令使謂秦繆公亡鄭秦厚晉秦不爲利君何不解鄭爲東道主行李之往來供其困乏

鄭在秦東。故云。恐未可概用。漢光武謂鄧晨曰。以十郡爲我北道主人。概用之誤可見。

敗乃公事

漢高帝罵曰。豎儒幾敗乃公事。敗字作一頓。乃公事作一句。乃公。高帝自謂也。公下添一之字。更見明白。

孫武孫臆

孫武子者。齊人。事吳王闔閭爲將。作兵法十三篇。以吳王愛姬作隊長。教戰死吳。顯名諸侯。孫子力也。孫臆。武裔也。與龐涓共學鬼谷子。涓自知不如臆。爲魏將。召臆。以法刑斷其兩足而黥之。後臆殺死涓于馬陵大樹下。則顯是兩人。

堅白異同

公孫龍爲堅白異同之論。汝南有龍淵水。可用淬刀劍。特堅利。故有堅白之論云。黃所以爲堅也。白所以爲利也。或辨之曰。白所以爲不堅。黃所以爲不利。則異同矣。

趙高

趙高。趙疏族也。趙高昆弟數人。皆生隱宮。蓋高父犯宮刑。妻子沒爲奴婢。妻後野合生高等。皆承趙姓。竝宮之。故云兄弟生於隱宮。

徐市音福

徐市近誤以市爲市。又改市爲福。市欲避秦始皇暴。假求神仙名。入海。選童男女各五百人。百工技藝。無

不備具。資秦立國海外。卽今日本國也。迄今尙多古文書。

不識紇字

臧紇、叔梁紇。音呬。而世多呼爲核。唐蕭穎士聞人誤呼武仲名。因曰紇字也不識。今呼瞎。愈誤矣。

睢陽忠烈

賊圍睢陽危甚。張巡遣南霽雲乞師于賀蘭進明。不與。斷一指。同行部將王玢亦斷一指。先死。睢陽史獨
不志。忠烈泯滅。惜哉。

南漢

按廣州府劉王家磚。有景定辛巳之號。則劉隱亦有年號。史佚之耳。

北漢

後漢劉閔。知遠弟。其子湘陰公斌爲漢嗣。尋廢之。爲周郭威所殺。閔遂卽位於太原。此以父繼子也。

五馬渡江音紅

晉五馬琅琊王司馬睿、彭城王司馬釋、一曰西陽王司馬業、汝南王司馬祐、南頓王司馬宗。今止記四馬。以彭城王最先亡。故也。洛中童謠曰。五馬浮渡江。一馬化爲龍。

素王

孔子稱素王。近讀帝王之王。平聲。不知此王字。當讀作去聲。

改根爲銀

韓昶文公愈之子。雖教有義方。而性頗闇劣。嘗爲集賢校理。史傳有金根車。而昶以爲誤。悉改根爲銀。後除拾遺。坐此字罷。

堯九男

堯娶散宜氏之女曰女皇。生丹朱。又有庶子九人。皆不肖也。

焚廩

史記。舜乃以兩笠自扞而下。去。通史云。瞽使舜滌廩。舜告二女。二女曰。時其焚汝。鵠汝衣裳。鳥工往。舜既登廩。得免去也。列女傳。二女教舜鳥工。上廩以兩笠自扞。有似鳥翅而輕下。得不損傷。

浚井

通史云。舜穿井。又告二女。二女曰。去汝裳衣。龍工往。入井。瞽瞍與象下土實井。舜從他井出也。括地志云。舜井在媯州懷戎縣西外城中。其西又有一井。竝舜井也。

羿浞

帝相被篡。歷羿浞二世四十年。而本紀不記。此馬遷疏略也。寒浞殺羿於桃梧而烹之。以食其子。其子不忍食。殺於窮門。浞遂代夏。襲有窮之號。因羿之室生稟及殪。

放桀

淮南子湯放桀於歷山桀與妹喜同舟浮江南奔南巢之山而死。

五遷

湯自南亳遷西亳仲下遷敖河。夏甲居相祖乙居耿盤庚渡河南居西亳是爲五遷。

啓紂嫡庶

世云啓與紂異母啓長而庶生紂次而嫡出。呂氏春秋言母當生啓時猶未正立及生紂時始立爲妃。故啓大而庶紂小而嫡鄭元亦云同母。

太伯

太伯奔吳所居城在蘇州北五十里常州無錫縣界梅里村其城冢可考。

文武

大戴禮云文王十五歲而生武王則武王少文王十四歲矣禮記文王世子篇云文王九十七而終武王九十三而終按文王崩時武王已八十三矣八十四卽位至九十三崩武王已滿十年書言十三年伐紂者續文王受命年欲明其卒父業也。

西東周君

世本西周桓公名揭居河南東周惠公名班居洛陽。

柳下惠

論語註。柳下食邑名。孟子註。居柳下。趙岐註。孟子云。柳下是號。按食邑見左傳孔疏。居柳下見莊子註。然總不知出何書。且魯地竝無柳下邑里之名。又按趙岐此註。柳下惠姓展名禽。字季。柳下是其號。亦似有誤。據柳下氏展係公子展之後名。獲見國語。字禽見左傳。又字季見國策。莊子曰。諡惠見列女傳。是禽與季皆是字。而趙岐以禽爲名。季爲字。是名字且誤。何況其號。左傳孔疏。季五十字。禽二十字。

捲白波

古有酒令名捲白波。起於東漢初。擒白波賊如席捲。故酒席言之以快人意耳。

宦海

仙傳拾遺。有道士謂顏真卿奇骨可度世。不然必沈宦海。



握蘭軒隨筆卷下

營衛

黃帝以師爲營衛。環繞軍兵爲營。以自衛。今轅門卽其遺象。正義：軍行以車爲陣。轅相向爲門。故云。

九夷

畎夷。于夷。方夷。黃夷。白夷。赤夷。元夷。風夷。陽夷。

異類感人

仇愈字徽猷。自言頃年爲東州一邑宰。晨起視事。方受牒訴。有鸛雀翔舞庭下。驅馳久之。方去。明日復來。仇異之。遣一吏跡所止。出城數里。見一大樹。鸛雀止其上。有巢焉。數子啁啾其中。下有數人持鋸斧繩索。將伐之。吏止。引其人見仇。問所值。曰五千。仇以己錢如數付之。戒勿伐。鸛雀異類也。其若有求于廉吏也如此。

茶名

一曰茶。二曰檟。三曰葢。四曰茗。五曰荈。楊雄注云：蜀西南謂茶曰葢。郭璞云：早取爲茶。晚爲茗。又爲荈。

三徑

近世多謂淵明故事。讀楊誠齋詩云：三徑初開自蔣卿。再開三徑是淵明。誠齋奄有三三徑。一徑花開一

徑行。則知三徑之開。淵明其後也。考蔣詡竹下開三徑。惟故人求仲羊仲從之游耳。

滑稽

滑。亂也。稽。同也。謂辯捷之人。言非若是。言是若非。能亂異同也。一云滑稽酒器。可轉注吐酒不已。以言俳優之人。出口成章。詞不窮竭。如滑稽之吐酒不已也。

眠兒歌

歌內翰所作文字。名目至廣。唐學士撰宮中眠兒歌。卽是今之剗彌月頭文。

丈人

丈人。本父友之號。不必婦翁。漢書匈奴傳。天子我丈人行。唐人尤喜稱之。杜子美上韋左丞詩曰。丈人試靜聽。不聞子美之妻爲韋氏也。如此者甚多。柳子厚記先友韓退之。其一也。至與之書。乃稱退之十八丈友。而字之者。以其齒相近乎。近歲之俗。不問行輩年齒。泛相稱必曰丈。不知起自何人。而舉世從之耶。

屬橐

舊說歐陽公雖作一二字小簡。亦必屬橐。其不輕易如是。然今集中所見。乃明白平易。反若未嘗經意者。而自然爾雅。非常人所及。東坡大抵相類。初不過爲文采也。

商均

舜妃娥皇女英。娥皇無子女。英生商均。